

## Éagóir á déanamh ar oibrithe

### Ceist 1

Beidh tú ag féachaint ar ball ar thuairisc faoi mhí-úsáid i measc oibrithe sa láthair oibre. Sula bhféachann tú ar an mír, an féidir leat féin agus leis an duine in aice leat brí na bhfocal seo a aimsiú?

1. grúpa feachtais \_\_\_\_\_
2. an earnáil fáilteachais \_\_\_\_\_
3. ciapadh gnéis (gnéasach) \_\_\_\_\_
4. údar gearáin \_\_\_\_\_
5. gur fhulaing \_\_\_\_\_
6. ceal fianaise \_\_\_\_\_
7. tagtha chun solais \_\_\_\_\_
8. feasacht \_\_\_\_\_
9. caith go maith le \_\_\_\_\_
10. truamhéalach \_\_\_\_\_
11. tuillte \_\_\_\_\_

Féach ar an mír den chéad uair le feiceáil an gcabhróidh sé sin leat na focail a thuiscint.

### Ceist 2

Éist leis an mír arís, agus ansin pléigh ábhar na míre leis an duine in aice leat.

### Ceist 3

Féach ar an mír arís, agus freagair na ceisteanna seo thíos.

1. Cá ndearnadh an suirbhé agus cad a léiríonn torthaí an tsuirbhé?
2. Cad iad na figiúirí a luadh sa mhír agus cad a léiríonn siad?
3. Cad a bhí le rá ag Trevor Ó Clochartaigh agus ag Eva Ní Mhistéil?
4. Cé a bheidh ag an gcruinniú i gCathair na Gaillimhe anocht?

### Ceist 4

‘...déanfar...’

- A. Cén aimsir atá i gceist sa sampla thuas?
- B. Bain úsáid as na briathra thíos chun na deirí san aimsir chéanna a léiriú. Tá an chéad cheann déanta duit!

Dún	Bris
dúnfaidh mé dúnfaidh tú dúnfaidh sé dúnfaidh sí dúnfaimid dúnfaidh sibh dúnfaidh siad <u>Sb.</u> dúnfar  <u>An fhoirm cheisteach</u> An ndúnfaidh...?	

Ceannaigh	Léirigh

**Ceist 5** ‘...beidh...’

A. Cad faoi na briathra mírialta san aimsir fháistineach? Líon na bearnaí sa tábla leis an bhfoirm cheart den bhriathar san aimsir fháistineach.

	An cheist	Na freagraí
<b>Abair</b>	An ndéarfaidh tú...?	
<b>Beir</b>		Béarfaidh./Ní bhéarfaidh.
<b>Bí</b>	An mbeidh sé...?	
<b>Clois</b>		Cloisfidh./Ní chloisfidh.
<b>Déan</b>	An ndéanfaidh sibh...?	
<b>Faigh</b>		Gheobhaidh./Ní bhfaighidh.
<b>Feic</b>	An bhfeicfidh siad...?	
<b>Ith</b>		Íosfaidh./Ní íosfaidh.
<b>Tabhair</b>	An dtabharfaidh tú...?	
<b>Tar</b>		Tiocfaidh./Ní thiocfaidh.
<b>Téigh</b>	An rachaidh sí...?	

B. Cuir ceisteanna ar an duine in aice leat faoi na pleananna atá aige nó aici don samhradh. Mar shampla:

*An mbeidh tú ag obair an samhradh seo?  
An rachaidh tú thar lear i mbliana?  
An dtiocfaidh cuairteoirí ar bith chugat don samhradh?*

**Ceist 6** Pléigh na ceisteanna seo leis an duine in aice leat, nó le do ghrúpa.

1. Cad é an post is measa a bhí agat riamh? Cén fáth?
2. An gcaitear níos measa le hoibrithe san earnáil fáilteachais ná mar a chaitear le hoibrithe in earnálacha eile, dar leat? Cén fáth?
3. Deirtear gur obair chrua í an obair san earnáil fáilteachais. Cén fáth a ndeirtear amhlaidh, dar leat?

**Treoracha agus Freagraí**

**Ceist 1**

- |                             |                               |
|-----------------------------|-------------------------------|
| 1. grúpa feachtais          | <i>campaign group</i>         |
| 2. an earnáil fáilteachais  | <i>the hospitality sector</i> |
| 3. ciapadh gnéis (gnéasach) | <i>sexual harassment</i>      |
| 4. údar gearáin             | <i>cause for complaint</i>    |
| 5. gur fhulaing             | <i>that suffered</i>          |
| 6. ceal fianaise            | <i>lack of evidence</i>       |
| 7. tagtha chun solais       | <i>come to light</i>          |
| 8. feasacht                 | <i>awareness</i>              |
| 9. caith go maith le        | <i>treat well</i>             |
| 10. truamhéalach            | <i>pathetic</i>               |
| 11. tuillte                 | <i>deserved</i>               |

**Ceist 2**

Féach an script.

**Ceist 3**

Féach an script.

**Ceist 4**

A. An aimsir fháistineach.

B.	<p><b>Dún</b> dúnfaidh mé dúnfaidh tú dúnfaidh sé dúnfaidh sí dúnfaimid dúnfaidh sibh dúnfaidh siad <u>Sb.</u> dúnfar</p> <p><u>An fhoirm cheisteach</u> An ndúnfaidh...?</p>	<p><b>Bris</b> brisfidh mé brisfidh tú brisfidh sé brisfidh sí brisfimid brisfidh sibh brisfidh siad <u>Sb.</u> brisfear</p> <p><u>An fhoirm cheisteach</u> An mbrisfidh...?</p>
	<p><b>Ceannaigh</b> ceannóidh mé ceannóidh tú ceannóidh sé ceannóidh sí ceannóimid ceannóidh sibh ceannóidh siad <u>Sb.</u> ceannófar</p> <p><u>An fhoirm cheisteach</u> An gceannóidh...?</p>	<p><b>Léirigh</b> léireoidh mé léireoidh tú léireoidh sé léireoidh sí léireoimid léireoidh sibh léireoidh siad <u>Sb.</u> léireofar</p> <p><u>An fhoirm cheisteach</u> An léireoidh...?</p>

**Ceist 5**

A.

	<b>An cheist</b>	<b>Na freagraí</b>
<b>Abair</b>	An ndéarfaidh tú...?	Déarfaidh./Ní déarfaidh.
<b>Beir</b>	An mbéarfaidh siad...?	Béarfaidh./Ní bhéarfaidh.
<b>Bí</b>	An mbeidh sé...?	Beidh./Ní bheidh.
<b>Clois</b>	An gcloisfidh sí....?	Cloisfidh./Ní chloisfidh.
<b>Déan</b>	An ndéanfaidh sibh...?	Déanfaidh./Ní dhéanfaidh.
<b>Faigh</b>	An bhfaighidh tú...?	Gheobhaidh./Ní bhfaighidh.
<b>Feic</b>	An bhfeicfidh siad...?	Feicfidh./Ní fheicfidh.
<b>Ith</b>	An íosfaidh sé...?	Íosfaidh./Ní íosfaidh.
<b>Tabhair</b>	An dtabharfaidh tú...?	Tabharfaidh./Ní thabharfaidh.
<b>Tar</b>	An dtiocfaidh sibh...?	Tiocfaidh./Ní thiocfaidh.
<b>Téigh</b>	An rachaidh sí...?	Rachaidh./Ní rachaidh.

Níor cheart forainm (**sé, sí,** etc.) a úsáid agus freagra dearfach nó diúltach á thabhairt ar cheist san aimsir fháistineach.

B. Gníomhaíocht chainte atá i gceist.

**Ceist 6**

Is féidir gach beirt a chur ag déanamh an phlé seo agus ansin cuid de na ceisteanna a phlé leis an rang iomlán.

### **Eimear Ní Chonaola**

Léiríonn suirbhé atá déanta ag grúpa feachtais i measc oibrithe san earnáil fáilteachais i gCathair agus i gContae na Gaillimhe go bhfuil mí-úsáid á baint<sup>1</sup> go forleathan as oibrithe sa tionscal. Tá mí-úsáid ó bhéal agus mí-úsáid fhisiciúil, chomh maith le ciapadh gnéis agus deacrachtaí le coinníollacha oibre, i measc na n-údar gearáin atá ag oibrithe. Déanfar plé ar an ábhar ag cruinniú i gCathair na Gaillimhe anocht.

### **Máire T. Ní Mhadaoin**

Os cionn ceithre chéad oibrí i gCathair agus i gContae na Gaillimhe a ghlac páirt i suirbhé a rinneadh<sup>2</sup> mar thoradh ar ghearáin a tháinig chun cinn faoi mhí-úsáid san earnáil fáilteachais.

Léiríonn na figiúirí atá feicthe ag Nuacht TG4 agus a chuirfear ar fáil go poiblí ag cruinniú sa gcathair<sup>3</sup> anocht, gur fhulaing 78% de na hoibrithe a ghlac páirt sa suirbhé mí-úsáid ó bhéal. D'fhulaing 36% acu ciapadh gnéis. Anuas air sin, le teann faitís nó ceal fianaise, níor thuiriscigh 60% de na hoibrithe an méid a tharla dóibh.

Tá feachtas curtha ar bun ag iar-oibrithe san earnáil, le tacaíocht ó pholaiteoirí áitiúla, féachaint le haghaidh a thabhairt ar dheacrachtaí atá tagtha chun solais.

### **An Seanadóir, Trevor Ó Clochartaigh, Sinn Féin**

Bhuel, is léir go bhfuil deacrachtaí móra in earnáil an fháilteachais anseo i nGaillimh. Is éard atá muid ag iarraidh a dhéanamh ag an gcruinniú anocht ná feasacht na n-oibrithe<sup>4</sup> a ardú maidir leis na cearta atá acu, dul i ngleic leis na deacrachtaí atá san earnáil agus aitheantas a fháil ón earnáil go bhfuil fadhbanna ann. Agus ansin, feachtas dearfach a chur ar bun le tacú leis na bialanna agus na tithe a thugann cearta oibrithe ar bord agus a chaitheann go maith le hoibrithe, agus tacaíocht dá réir a thabhairt dóibh sin.

### **Máire T. Ní Mhadaoin**

Anuas air sin, deir an Seanadóir Ó Clochartaigh, go bhfuil cuid de na scéalta pearsanta atá ag teacht chun cinn scanrúil agus truamhéalach. Agus tá moladh tuillte, a deir sé, ag na hoibrithe atá chun labhairt amach ag cruinniú na hoíche anocht.

### **Eva Ní Mhistéil, Co. Thiobraid Árann**

Bhí mé ag obair sa tionscal ar feadh sé bliana. Tharla drochrudaí domsa agus do na daoine a bhí ag obair liom. Níl sé ceart agus sin é an fáth go<sup>5</sup> bhfuil mé ag labhairt amach.

### **Máire T. Ní Mhadaoin**

Chomh maith le hiar-oibrithe san earnáil, beidh ionadaithe ceardchumann, lucht ollscoile, ionadaí ón gCoimisiún um Chaidreamh san Áit Oibre agus neart eile i láthair ag cruinniú na hoíche anocht.

Máire T. Ní Mhadaoin, Nuacht TG4 i nGaillimh.

---

<sup>1</sup> á bhaint a deirtear

<sup>2</sup> a dearnadh a deirtear

<sup>3</sup> Córas Chonnacht

<sup>4</sup> na hoibrithe a deirtear

<sup>5</sup> an fáth a bhfuil an leagan caighdeánach